



PATNUBAY SA MISA

24 Pebrero 2019

Ika-7 Linggo sa Karaniwang Panahon

Taon K

Ang Kahangalang Kristiyano

Tayo ay nasa Ikapitong Linggo sa Karaniwang Panahon. Ang alagad ni Kristo ay tunay na kakaiba sa lahat ng tao. Ito ay dahil sa maituturing na kahangalan ang kanyang pag-uugali at pamamaraan.

Ang mga ito ay ibang iba sa ginagawa ng ibang mga tao sa daigdig na ito. At ang mahalaga sa isang Kristiyano ay walang halaga para sa mga taong nahuhumaling sa daigdig na ito. Hindi nila maunawaan bakit pinag-uukulan ng pansin ng isang Kristiyano ang mga bagay na kanilang kinukutya. At ang pinakamalaking kahangalang Kristiyano ay ang pagpapatawad.



PASIMULA



Pambungad

(Ipahahayag lamang kung walang awiting nakahanda.)

D'yos ko, ako'y nananalig sa matapat mong pag-ibig. Ang puso ko'y umaawit dahil ako'y 'yong sinagip, nililingap bawat saglit.

Pagbati

P—Ang pagpapala ng ating Panginoong Hesukristong nagdadala ng pagkakaiba, ang pag-ibig ng Diyos Amang mapagpatawad, at ang pakikipagkaisa ng Espiritu Santong nagpapabanal ay sumainyong lahat!
B—At sumaiyo rin!

Pagsisi

P—Nagsasaya tayo sa Panginoong Hesus na siyang nagbigay ng pagkakaiba at lasa sa ating buhay. Pagsisihan natin ang ating kawalan ng kakayahang tanggapin ang pagkakaibang kanyang dala. (Manahimik sandali.)

P—Para sa aming kawalan ng pananampalataya sa iyong

dakilang pamamaraan, Panginoon, kaawaan mo kami!

B—Panginoon, kaawaan mo kami!

P—Para sa aming kahinaan ng pag-asa sa iyong katapatan sa iyong mga alagad, Kristo, kaawaan mo kami!

B—Kristo, kaawaan mo kami!

P—Para sa aming kakulangan ng pagmamahal sa iyo at sa mga nakasakit sa amin, Panginoon, kaawaan mo kami!

B—Panginoon, kaawaan mo kami!

P—Kaawaan tayo ng makapangyarihang Diyos, patawarin tayo sa ating mga kasalanan, at dalhin tayo sa buhay na walang hanggan.

B—Amen!

Papuri

B—Papuri sa Diyos sa kaitaasan at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbunyi ka namin, pinasalamatan ka namin dahil sa dakila mong angking kapurihan. Panginoong Diyos, Hari ng langit, Diyos

Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalangiang Pambungad

P—Ama naming makapangyarihan, maisaloob nawa naming paglagian ang mga galing sa Espiritu ng kabanalan upang sa salita at gawa ay aming magampanan ang lahat ng iyong mga kinalulugdan sa pamamagitan ni Hesukristo kasama ng Espiritu Santo magpawalang hanggan.

B—Amen!

**PAGPAPAHAYAG NG
SALITA NG DIYOS**



Unang Pagbasa 1 Sam 26:2.7-9.
12-13.22-23

Dalawang aral ang nais ituro sa atin ng sipi galing sa Unang Aklat ni Samuel. Ang una ay ang paggalang sa taong hinirang ng Diyos. Ang ikalawa ay ang kagandahan ng pagpapatawad. Hindi man lamang inisip ni David na saktan si Haring Saul. Sa halip ay pinatawad niya ito sa walang kadahilanan nitong pagtatangka sa kanyang buhay.

L – Pagpapahayag mula sa Unang Aklat ni Samuel

Noong mga araw na iyon, lumakad si Saul, kasama ang tatlong libong piling kawal na Israelita, upang hulihin si David.

Kinagabihan, lihim na pinasok nina David at Abisai ang kampo ni Saul. Dinatnan nila itong tulong na tulog at napaliligiran ni Abner at ng buong hukbo. Ang sibat nito ay nakatarak sa gawing ulunan. Sinabi ni Abisai kay David, “Niloob ng Diyos na mahulog ngayon sa mga kamay mo ang iyong kaaway. Kung ibig mo, tatarakan ko na siya ng sibat. Kapag nasaksak kong minsan iyan, hindi na kakailanganing ulitin.” Ngunit sinabi ni David, “Huwag mong gagawin iyan. Malaking kasalanan ang magbuhat ng kamay sa hinirang ng Panginoon.” Kinuha nga ni David ang sibat sa ulunan ni Saul at ang lalagyan ng inumin nito, at sila’y umalis. Isa man kina Saul ay walang nagising pagkat pinahimbing sila ng Panginoon. Dumating at umalis sina David nang walang nakaalam.

Pagdating ni David sa kabilang gulod, tumayo siya sa isang mataas na lugar. Sinabi ni David, “Narito ang inyong sibat, mahal na hari. Ipakuha ninyo rito sa isa ninyong tauhan. Ang taong tapat at matuwid ay gagan-timpalaan ng Panginoon. Sa araw na ito’y niloob niyang mahulog kayo sa aking mga kamay ngunit hindi ko maaaring pagbuhatan ng kamay ang hinirang ng Panginoon.”

Ang Salita ng Diyos!
B – Salamat sa Diyos!

Salmong Tugunan Awit 102

B – *Ang ating mahabaging D’yos ay nagmamagandang-loob!*

R. M. Velez



* Panginoon’y papurihan, purihin mo, kaluluwa, ang pangalan niyang banal purihin mo sa tuwina. Ikaw, aking kaluluwa, ang Diyos ay papurihan, at huwag mong lilimutin yaong kanyang kabutihan. **B.**

* Ang lahat kong kasalana’y siya ang nagpapatawad, at anumang aking sakit, ginagamot niyang lahat. Sa bingit ng kamatayan ako ay iniligtas, at pinagpapala ako sa pag-ibig niya’t habag. **B.**

* Kay ganda ng kalooban, maha-bagin itong Diyos, kung magalit ay banayad, kung umibig nama’y lubos. Kung siya ay magparusa, di katumbas ng pagsuway; di na tayo sinisingil sa nagawang kasalanan. **B.**

* Ang silangan at kanluran kung gaano ang distansiya, gayung-gayon ang pagtingin sa sinumang nagkasala. Kung paano nahahabag ang ama sa anak niya, gayon siya nahahabag sa may takot sa kanya. **B.**

Ikalawang Pagbasa 1 Cor 15:45-49

Itinuturo ng ating pagbasa ang paghahalintulad kay Hesus-kristo, ang Pangalawang Adan, sa Unang Adan. Tayo ay may kaugnayan sa dalawang Adang ito. Ngunit higit ang bungang idudulot ng Pangalawang Adan sa ating buhay.

L – Pagpapahayag mula sa Unang Sulat ni Apostol San Pablo sa mga taga-Corinto

Mga kapatid, ganito ang sinasabi sa Kasulatan: “Ang unang tao, si Adan, ay nilikhang binigyan ng buhay”; ang huling Adan ay Espiritung nagbibigay-buhay. Ngunit hindi nauna ang panlangit; ang panlupa muna bago ang panlangit. Ang unang Adan ay mula sa lupa, sapagkat nilikha sa alabok; mula sa langit ang pangalawang Adan.

Ang mga katawang panlupa ay tulad ng nagmula sa lupa; ang mga katawang panlangit ay tulad ng nagmula sa langit.

Kung paanong tayo’y katulad ng taong nagmula sa lupa, darating ang araw na matutulad din tayo sa nanggaling sa langit.

Ang Salita ng Diyos!
B – Salamat sa Diyos!

Aleluya Jn 13:34

B – **Aleluya! Aleluya!**
Bagong utos, ani Kristo, mag-ibigan sana kayo katulad ng pag-ibig ko. **Aleluya! Aleluya!**

Mabuting Balita Lu 6:27-38

Ang ating Ebanghelyo ay nagtuturong kailangan nating higitan ang karaniwang tao dahil tayo ay mga alagad ni Kristo. Dapat nating kayanin ang hindi kayang gawin ng iba – ibigin ang ating kaaway, gawan ng mabuti ang napopoot sa atin, pagpalain ang sumusumpa sa atin, at ipanalangin ang umaapi sa atin.

P – Ang Mabuting Balita ng Panginoon ayon kay San Lucas
B – Papuri sa iyo, Panginoon!

Noong panahong iyon, sinabi ni Hesus sa kanyang mga alagad: “Sinasabi ko sa inyo, mga nakikinig: Ibigin ninyo ang inyong mga kaaway, gawan ninyo ng mabuti ang mga napopoot sa inyo, pagpalain ninyo ang mga sumusumpa sa inyo, idalangin ninyo ang mga umaapi sa inyo. Kapag sinampal ka sa isang pisngi, iharap mo rin ang kabila. Kapag inaagaw ang iyong balabal, ibigay mo pati ang iyong baro. Bigyan mo ang bawat nanghingi sa iyo; at kung may kumuha sa iyong ari-arian ay huwag mo nang bawiin pa ang mga iyon. Gawin ninyo sa iba ang ibig ninyong gawin nila sa inyo.

Kung ang iibigin lamang ninyo ay ang mga umiibig sa inyo, ano pang gantimpala ang inyong hihintayin? Kahit ang mga makasalanan ay umiibig din sa mga umiibig sa kanila. At kung ang gagawan lamang ninyo ng mabuti ay ang gumagawa sa inyo ng mabuti, ano pang gantimpala ang inyong hihintayin? Kahit ang mga makasalanan ay gumagawa rin nito! Kung ang pahihiramin lamang ninyo ay ang mga taong inaasahan ninyong makabayad sa inyo, ano pang gantimpala ang inyong hihintayin? Kahit ang mga makasalanan ay nagpapahiram din sa mga makasalanan sa pag-asang ang mga ito’y makabayad!

Sa halip, ibigin ninyo ang inyong

mga kaaway, at gawan ninyo sila ng mabuti. Magpahiram kayo, na hindi umaasa sa anumang kabayaran. Sa gayon, malaking gantimpala ang tata-muhin ninyo, at kayo'y magiging mga anak ng Kataas-taasan. Sapagkat siya'y mabuti sa masasama at sa mga hindi marunong tumanaw ng utang na loob. Maging mahabagin kayo gaya ng inyong Ama.

Huwag kayong humatol, at hindi kayo hahatulan ng Diyos. Huwag kayong magparusa at hindi kayo parurusahan ng Diyos. Magpatawad kayo sa inyong kapwa, at patatawarin kayo ng Diyos. Magbigay kayo, at bibigyan kayo ng Diyos: hustong takal, siksik, liglig, at umaapaw pa ang ibibigay sa inyo. Sapagkat ang takalang ginagamit ninyo sa iba ay siya ring gagamitin ng Diyos sa inyo."

Ang Mabuting Balita ng Panginoon!

B – Pinupuri ka namin, Panginoong Hesukristo!

Homiliya

Sumasampalataya

B– Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatawan-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P–Tayo ay nagpapasalamat sa pagtawag sa atin ng Panginoon bilang kanyang mga alagad. Puno ng paghahangad na tayo ay maging

matatag na tagasunod ni Kristo ating sasambitin:

B – Amang humirang sa amin, dinggin Mo ang Iyong Bayan!

* Para sa mga namumuno sa Simbahan, upang maging matatag sila sa pangunguna sa Bayan ng Diyos sa pagsasabuhay ng turo ng Ebanghelyo, manalangin tayo sa Panginoon! **B.**

* Para sa lahat ng mga kabataan ng ating bayan, upang sa taong ito ng mga kabataan ay mapangatawanan nila ang pagsasakatu-paran sa isinasaad ng Magandang Balita ng kaligtasan, manalangin tayo sa Panginoon! **B.**

* Para sa mga namumuno sa ating bansa, upang maibsan nila ang galit, poot, at pagnanasang maghiganti sa ilan sa ating mga kababayan, manalangin tayo sa Panginoon! **B.**

* Para sa mga taong nakaranas ng pang-aapi at pananakit, upang maghilom ang sugat ng kanilang mga puso at matuto silang umunawa at magpatawad, manalangin tayo sa Panginoon! **B.**

* Para sa ating lahat na nagkakatipon sa pagdiriwang na ito, upang tumibay ang ating loob sa pagtataguyod ng pagpapatawad, kapatiran, at tunay na pagdadamayan sa ating pamayanan, manalangin tayo sa Panginoon! **B.**

* Tahimik nating ipanalangin ang ating mga sariling kahilingan. (*Tumigil sandali.*)

Manalangin tayo! **B.**

P–Ama naming bukal ng awa at habag, pumanaog nawa sa amin ang Iyong Banal na Espiritu upang maghilom ang aming mga sugatang puso at matuto kaming magpatawad nang wagas sa mga nakasakit sa amin, alinsunod sa turo ng Iyong Anak na si Hesukristong aming Panginoon.

B – Amen!



P–Manalangin kayo. . .

B– Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P–Ama naming Lumikha, sa pagganap namin ng banal na pagdiriwang upang ikaw ngayo'y aming paglingkuran, hinihiling naming nawa'y mapakinabangan ang aming inihahain sa iyong karangalan sa pamamagitan ni Hesukristo kasama ng Espiritu Santo magpasawalang hanggan.

B – Amen!

Prepasyo III

P –Ama naming makapangyarihan, tunay ngang marapat na ikaw ay aming pasalamat.

Sa iyong kagandahang-loob kami'y iyong ibinukod upang iyong maitampok sa kadakilaan mong lubos. Kahit na ikaw ay aming tinalikdan dahil sa aming pagkasalawahan, gumawa ka pa rin ng magandang paraang may manguna sa amin para ikaw ay balikan. Kaya't ang iyong minamahal na Anak ay naging isa sa mga taong hamak upang may kapwa kaming makapagligtas sa aming pagkapahamak at pagkaligaw ng landas.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B – Santo, santo, santo . . .

Pagbubunyi

B –Aming ipinahahayag na namatay ang 'yong Anak, nabuhay bilang Mesiyas at magbabalik sa wakas para mahayag sa lahat.



B– Ama namin . . .

P– Hinihiling namin . . .

B– Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B– Kordero ng Diyos . . .

Paanyaya sa Pakikinabang

P– Ito si Hesus na nag-aanyaya sa ating ibigin kahit na ang ating mga kaaway. Siya ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B– Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinaabang
(Ipahahayag lamang kung walang awiting nakahanda.)

D'yos ko, aking isasaysay ang iyong ginawang tanan na kahangahangang tunay. Ang ngalan mo'y aawitan, Poong kataas-taasan.

Panalangin Pagkapakinabang
P– Ama naming mapagmahal, ipagkaloob mong aming mapakinabangan ang dulot na kaligtasan ng aming pinagsaluhan bilang sangla ng iyong tiyak na pagsagip sa tanan sa pamamagitan ni Hesu-

kristo kasama ng Espiritu Santo magpasawalang hanggan.

B– Amen!



P– Sumainyo ang Panginoon.
B– At sumaiyo rin!

P– Pagpalain kayo ng makapangyarihang Diyos: Ama at Anak at Espiritu Santo.

B– Amen!

P– Humayo kayo sa kapayapaan upang mahalín ang inyong kapwa tulad ng ginawa ni Hesus.

B– Salamat sa Diyos!

Watch TV Maria

The Filipino Catholic TV Channel
On the following Channels:
* SatLite Channel 102
* Sky Cable Channel 210
* Destiny Cable Channel 96
Or via **live streaming**
at www.tvmaria.ph

Ang Kahangalan ng Pagpapatawad

Ang sabi ni Alexander Pope: “Ang magkamali ay Amakatao; ang magpatawad ay maka-Diyos.” Dahil sa napakahirap magpatawad ay kailangan natin ang lakas na maaaring manggaling lamang sa Diyos. Ang turo nga ni San Agustin: “Maraming uri ng mabubuting gawang magdudulot ng kapatawaran sa ating mga kasalanan. Ngunit walang hihigit sa taos-pusong pagpapatawad sa taong nakasakit sa atin.” Sabi nga ni Horace Bushnell: “Ang pagpapatawad ang pinakadakilang pangangailangan ng tao at siya ring pinakamatayog niyang tagumpay.” Ayon nga kay George Herbert: “Ang hindi kayang magpatawad ay pinababagsak ang tulay na dapat din niyang tawirin.”

Hindi ang pagpapatawad ang nasa loob ng maraming tao. Ang nais nila ay katarungan. Ang hangad nila ay makaganti. Kaya nga ang turo ni Hesus na magpatawad at maging mabait sa mga nakasakit sa atin ay tunay na kahangalan para sa kanila. Kung sila ay pinahirapan, dapat lamang na maghirap din ang mga nagpahirap sa kanila. Kailangan nilang pagbayaran ang kanilang mga pagkakamali at pagkakasala. Sa America ay napakaraming mga abogado dahil napakarami roon ang gustong magsampa ng kaso sa hukuman upang makaganti.

May nagkuwentong pinayagan daw ni Napoleon Bonaparte ang isang prinsipeng pumunta sa bilangguan upang magpatawad at magpalaya sa isang bilanggo. Kinausap niya ang lahat ng mga nakakulong doon. Lahat ay nagsabing wala sila talagang kasalanan, na sila ay napagbintangan lamang, na hindi naging makatarungan ang paglilitis sa kanila. Subalit may isang bilanggong

umiyak at umamin sa kanyang pagkakasala. Ang sabi nga niya ay tama lamang ang parusang iginawad sa kaniya. Humingi rin siya ng tawad sa kanyang mga nasaktan. Ito ang pinatawad ng prinsipe sa ngalan ng Emperador Napoleon.

Para mapatawad ay kailangan munang umamin sa pagkakamali, pagsisihan ito, at magpasyang magbabagong-buhay. Sa ating lipunan ay marami ang naging mandarambong. Ang sabi ng iba ay dapat daw patawarin na ang mga mandarambong na ito upang makausad na tayo. Dapat nga silang patawarin subalit kailangan muna silang umamin sa kanilang masamang nagawa, magsisi, humingi ng tawad, ibalik ang ninakaw sa bayan, at magbagong-buhay. Subalit kapag nagsisi nang wagas ay dapat talagang patawarin nang lubos. Ito ang turo ng Ebanghelyo.

Ang kailangang gawin ng mga nasaktan ay tahakin ang landas ng pagpapatawad. Mahirap magpatawad kaya hindi kaagad ito magagawa. Ngunit kapag naipagdarasal na nang taimtim ang mga nakasakit sa atin ay tinatahak na natin ang landas ng pagpapatawad. Marahil ay hindi pa natin sila kayang harapin, kamayan, kausapin, at kalimutan ang kanilang nagawa. Ngunit sa ating panalangin ay nakikipag-ugnayan na tayo sa kanila. At sa ating panalangin ay dapat nating hingin sa Diyos na pagpalain sila, umayos ang kanilang lagay, at matamo rin nila ang kaligtasan. Sa ating panalangin hiling natin sa Diyos na sa wakas ng panahon ay makasama rin natin sila sa Kanyang makalangit na tahanan.



WORD & LIFE PUBLICATIONS

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • **Telefax:** 894-5241 • **Website:** www.wordandlife.org

• **E-mail:** marketing@wordandlife.org; wordandlifepublications@gmail.com • **FB:** Word & Life Publications

• **Editorial Team:** Fr. S. Putzu, Fr. R. Lagaya, C. Valmonte, V. David, J. Domingo, A. Adsuara, D. Daguio

• **Illustrations:** A. Sarmiento, B. Cleofe • **Marketing:** Fr. B. Nolasco • **Circulation:** R. Saldua